



Broj: 06-1-07-1-4815/22  
Sarajevo, 05.12.2022. godine  
N.B.

Na osnovu člana 2.9 stav (1) tačka 9, a u vezi s članom 9.12 g Izbornog zakona Bosne i Hercegovine ("Službeni glasnik Bosne i Hercegovine" broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22 i 67/22) i članom 16. Uputstva o postupku provedbe posrednih izbora za tijela vlasti u Bosni i Hercegovini obuhvaćenih Izbornim zakonom Bosne i Hercegovine („Službeni glasnik BiH“, broj: 75/22), Centralna izborna komisija Bosne i Hercegovine je na 90. sjednici, održanoj 05.12. 2022. godine, donijela

## O D L U K U

### o utvrđivanju rezultata posrednih izbora u Domu naroda Parlamentarne skupštine Bosne i Hercegovine iz Republike Srpske

- (1) Centralna izborna komisija Bosne i Hercegovine utvrđuje rezultate posrednih izbora za Dom naroda Parlamentarne skupštine Bosne i Hercegovine iz Republike Srpske, kako slijedi:
  - a) Kandidatska lista predlagača **Denisa Šulića** nije osvojila nijedan glas.
  - b) Kandidatska lista predlagača **Ranke Perić Romić** osvojila je **12 glasova**,
  - c) Kandidatska lista **PDP-Partija demokratskog progressa** osvojila je **12 glasova**,
  - d) Kandidatska lista predlagača **Milana Radovića** osvojila je **16 glasova**,
  - e) Kandidatska lista predlagača **Anje Ljubojević** osvojila je **13 glasova**,
  - f) Kandidatska lista predlagača **Igora Žunića** osvojila je **14 glasova**,
  - g) Kandidatska lista predlagača **Saše Grbića**, osvojila je **2 glasa** i
  - h) Kandidatska lista poslanika **Mladena Ilića** osvojila je **14 glasova**.
- (2) Dodjelu mandata kandidatskim listama iz stava (1) dispozitiva ove Odluke u Domu naroda Parlamentarne skupštine Bosne i Hercegovine iz Republike Srpske, Centralna izborna komisija BiH izvršit će nakon pravosnažnosti ove Odluke.

## O b r a z l o ž e n j e

Narodna skupština Republike Srpske je dana 02.12.2022. godine Centralnoj izornoj komisiji Bosne i Hercegovine dostavila akt broj: 02/4.01-1-1798/22 od 01.12.2022. godine, te u prilogu istog cjelokupan izborni materijal u vezi s provedenim posrednim izborima za Dom naroda Parlamentarne skupštine Bosne i Hercegovine iz Republike Srpske, koji čine: Izvještaj o izboru delegata iz Republike Srpske u Dom naroda Parlamentarne skupštine Bosne i Hercegovine broj: 02/4.01-1-1798-1/22 od 01.12.2022. godine, birački spisak za izbor delegata iz reda srpskog naroda u Dom naroda Parlamentarne skupštine Bosne i Hercegovine, Zapisnik sa sjednice Komisije za izbor i imenovanja za prebrojavanje glasova radi izbora delegata iz Republike Srpske u Dom naroda Parlamentarne skupštine Bosne i Hercegovine broj: 02/4.01-1-1798/22 od 01.12.2022. godine, Zapisnik sa žrijebanja redosljeda političkih subjekata i predlagača kandidatskih listi na glasačkom listiću za Dom naroda Parlamentarne skupštine Bosne i Hercegovine, Odluka o usvajanju Izvještaja Komisije za izbor i imenovanje o izboru delegata iz Republike Srpske u Dom naroda Parlamentarne skupštine Bosne i Hercegovine, glasački

listići sa izbora delegata iz Republike Srpske u Dom naroda Parlamentarne skupštine Bosne i Hercegovine.

U skladu s članom 9.12a stav (4) Izbornog zakona Bosne i Hercegovine, delegate u Dom naroda Parlamentarne skupštine BiH (pet Srba) iz Republike Srpske bira Narodna skupština Republike Srpske.

Odredbama člana 9.12f Izbornog zakona BiH propisano je da svaki poslanik u Narodnoj skupštini Republike Srpske daje jedan glas za listu kandidata za izbor delegata u Dom naroda Parlamentarne skupštine BiH iz Republike Srpske.

Nakon provedenog tajnog glasanja, izborni materijal i rezultati glasanja iz člana 9.12f Izbornog zakona BiH dostavljaju se Centralnoj izbornoj komisiji BiH na utvrđivanje i potvrđivanje rezultata u skladu s članom 2.9 Izbornog zakona BiH i konačnu raspodjelu mandata u skladu sa članom 9.5 Izbornog zakona BiH.

Uvidom u dostavljeni materijal o provedenim posrednim izborima za Dom naroda Parlamentarne skupštine BiH utvrđeno je da su svi poslanici glasali, te da je Komisija za izbor i imenovanje koja je provodila posredne izbore konstatovala da je jedan (1) glasački listić nevažeći.

Odredbama člana 5.17 Izbornog zakona BiH propisano je da je glasački listić nevažeći:

1. ako nije ispunjen, ili je ispunjen tako da nije moguće sa sigurnošću utvrditi kojoj je političkoj stranci, koaliciji, nezavisnom kandidatu ili listi nezavisnih kandidata birač dao svoj glas;
2. ako su dopisana imena kandidata; ili
3. ako je označeno više od jedne političke stranke, koalicije, nezavisnog kandidata ili liste nezavisnih kandidata; ili
4. ako se na osnovu oznaka, koje je birač dopisao na glasački listić, kao što je potpis, može utvrditi njegov identitet; ili
5. ako birač označi glasački listić na način drugačiji od onog koji je utvrđen u članu 5.14 ovog Zakona.

Nadalje, članom 5.14 stav (1) Izbornog zakona BiH propisano je da Centralna izborna komisija BiH utvrđuje formu i sadržaj glasačkog listića za sve nivoe neposrednih izbora u Bosni i Hercegovini.

(2) Glasački listić omogućava biraču da glasa samo za jednu od sljedećih opcija:

1. nezavisnog kandidata; ili
2. političku stranku, koaliciju ili listu nezavisnih kandidata; ili
3. mogućnost da, u okviru kandidatske liste jedne političke stranke, koalicije ili liste nezavisnih kandidata, označi jednog ili više kandidata. Ako je birač ispravno označio jednog ili više kandidata na jednoj listi, smatra se da je ta lista dobila jedan važeći glas u svrhu raspodjele mandata.

(3) Birač može glasati samo na način koji je utvrđen u ovom članu.

Nadalje, u skladu s odredbama člana 13. Uputstva o postupku provedbe posrednih izbora za tijela vlasti u Bosni i Hercegovini obuhvaćenih Izbornim zakonom Bosne i Hercegovine utvrđen je izgled i sadržaj, te uputstvo o načinu glasanja na glasačkom listiću, gdje je jasno navedeno kada se glasački listić smatra nevažećim: Glasanje se vrši stavljanjem znaka X u kvadratić pored naziva predlagača kandidatske liste (politički subjekt ili poslanik zastupljen u Narodnoj skupštini Republike Srpske). Svaki poslanik u Narodnoj skupštini Republike Srpske daje jedan glas za listu kandidata za izbor delegata u Dom naroda Parlamentarne skupštine BiH. Glasački listić će biti nevažeći ukoliko se umjesto kandidatske liste označi ime kandidata na listi.

Budući da navedeni glasački listić ne sadrži nijednu nepravilnost utvrđenu članom 5.17 Izbornog zakona BiH, te da je označen samo jedan predlagač, to je Centralna izborna komisija BiH sa sigurnošću utvrdila kojoj političkoj opciji, odnosno kojem predlagaču je birač u konkretnom slučaju dao svoj glas. S tim u vezi, **Centralna izborna komisija BiH je zaključila da je u konkretnom slučaju glasački listić, koji je od strane Komisije za izbor i imenovanje proglašen nevažećim, važeći, te da je Kandidatska lista PDP-Partija demokratskog progresa osvojila ukupno 12 glasova.**

Imajući u vidu da su ispunjeni svi zakonski uslovi za utvrđivanje rezultata izbora za delegate u Domu naroda Parlamentarne skupštine BiH iz Republike Srpske, Centralna izborna komisija Bosne i Hercegovine je u skladu s članom 2.9 stav (1) tačka 9, a u vezi sa članom 9.12 g Izbornog zakona Bosne i Hercegovine, odlučila kao u dispozitivu ove Odluke.

**Pravna pouka:** Protiv ove odluke, u skladu s članom 6.9 stav (1) i stav (2) Izbornog zakona Bosne i Hercegovine, može se podnijeti žalba Apelacionom odjelu Suda Bosne i Hercegovine u roku od dva (2) dana od dana prijema ove odluke, koju Centralna izborna komisija BiH dostavlja putem faks aparata.

Žalba se podnosi preko Centralne izborne komisije BiH i dostavlja se putem faks aparata na broj 033/251-329 ili neposredno u sjedište Centralne izborne komisije BiH, Ulica Danijela Ozme broj 7, Sarajevo.

Dostaviti:

1. Narodna skupština Republike Srpske
2. a/a

